

Intervensaun S.E. Primeiru-Ministru Taur Matan Ruak Iha Jornada Orsamentu 2019 (Transkrisaun)

Salaun Ministériu Finansas, 27 Juñu 2019

Uluk nana 'in ha'u hakarak lori ami hotu nia naran fó saudasaun espesiál ba S.E. Sr. Prezidente parlamentu Nasionál ke apezar de serbisu barak bele arranja tempu hodi partisipa iha jornada orsamental ida ne'e. I ha'u nia saudasaun ne'e mós intensivu ba Sr./a Deputadu sira karik prezente iha ne'e, segundu lugar ha'u mós hakarak fó saudasaun ba Señór Membro Governu tomak, Sr. Diretores Jerais, Nasionais, Sr. Prezidente Autoridade no Administradór Munisipais no konvidadu sira tomak ba iha serimónia ida ne'e. agrade-se no parabeniza mos ba organizador sira liuliu ba Ministériu Finansas ne'ebé fó oportunidade ita ohin hasoru malu hodi bele troka ideia, prepara ita-nia na di'akliu hodi tama ba faze ne'ebé ita komesa la'o planeamentu ba ita-nia Orsamentu Jerál 2020 nian.

Ha'u nia intervensaun sei konsentra buat haat;

1. Problema saida mak ita iha
2. Solusaun saida mak ita fó ba ita-nia problema sira
3. Rezultadu saida mak ita hetan no
4. Impaktu saida ba ema nia moris.

Ne'e ha'u-nia intervensaun foku ba área haat (4) importante ne'e.

Mas antes ida ne'e, ha'u hakarak husu ba ita boot sira, saida mak ita halo hamutuk para bele transforma muda ita-nia nasaun. Se ita-boot sira haree ita koñese ita-nia an uitoan, ita-nia nasaun ida ne'e ki'ik oan metade *da ilha*, hale'u tasi, konta ho Ataúru, Oekusi no Jáku, rekursu naturais barak diversifikadu maibé *in termos de recursos humanos* ita iha difikuldades barak, teknolojikamente ita atraza uitoan, poténsia ekonomia ita kuaze depende ba petróleu, (fundu petrolíferu) maibé ita povu ida ke bele dehan resiliente. Se ita haree ita-nia istória ita liu iha faze tolu;

1. Kolonializasaun Portuguesa
2. Okupasaun Indonézia no

Faze Independénsia

Ita reziste i sobrevive adapta ita-nia an lais loos iha ambiente mudansa sira ne'e i ita konsege unifika povu ida ke multi étniku, multi linguístiku multi kultural, ita mais de 30 grupu étniku i konkista ida ne'e determina ohin ita hanesan Nasaun, hanesan Estadu. Iha esperiénsia nasaun sira seluk nian, sira harii uluk Estadu mak harii Nasaun, ita-nia kuaze halo simultánia, mas nasaun Nasaun iha uluk mak Estadu. Agora ha'u-nia pergunta: Iha era dezvoltamentu foun, ita iha kbiit ka lae atu adapta ita-nia an i reziste ka lae? Tanba kompetisaun iha mundu maka'as loos, kapitál ema halai tun-sa'e buka oportunidade i sira ne'ebé la konsege atrai hela ba kotuk, sira ne'ebé moris la'ós nasaun ida ne'ebé forte ou ida ne'ebé kiak, mas liuliu sira ne'ebé moris mak nasaun ida ne'ebé iha kbiit hatene adapta an lais iha mudansa sira, ita iha kondisoins ida ne'e ka lae?

Ita iha problema tolu importante ke dala barak ke ha'u gosta ha'u gosta temi:

1. Mudansa boot ida ke ita tenke halo, mak mudansa **Mentalidade**; dala barak ha'u

dehan, se ita pais terseiru mundu, ita-nia kakutak tenke primeiru mundu, mas se pais terseiru mundu, kakutak terseiru mundu ita labele kompete ho ema seluk, entaun mudansa mentalidade ne'e prosesu ida longo (prosesu naruk loos), se ita-boot sira haree ita-nia sidade, dadeer ita mai serbisu, ita nia inan sira hadeer mai sei hedi utu, ita lori sidade ba foho, sira lori foho mai sidade.

2. **Kompeténsia:** Ita la'ós ona provínsia, ita la'ós ona kolónia, ita Nasaun. Signifika katak ita tenke hatene atu lori ita-nia nasaun ba ne'ebé? Porké se ita la hatene, entaun tenke presija ema ida remote ita, entaun problema ida dehan *ownership*, ne'e iha ne'ebé? Na'in ba prosesu ne'e la iha tanba ida mak remote hela.
3. **Kultura de Trabalho (Kultura Serbisu):** Katak kultura serbisu nian, povu ida ke la iha kultura serbisu, nia labele ba oin, kultura serbisu ne'e mós liga ho paixau/domin ba ha'u-nia rain, hakarak halo mudansa iha ha'u-nia rain, se ita halo an mós mais um dia menus um dia aproveita de'it ne'e, ita labele la'ó. I entaun ha'u fiar tanba ita iha istória hatudu katak ita povu ida ke resiliente, ita reziste, adapta an fasilmente iha evolusaun siros longos tempos no konsege unifika esforsu hodi buka ita-nia hakarak, i ha'u espera pontu ida ne'e lori ita nafatin.

Segundu ita halo diagnóstiku uitoan kona-ba ita-nia situasaun sósiu-ekonómiku. Sra. Ministra Finansas ohin ko'alia oinsá sosialmente ita organiza ita-nia an, se ita haree iha parte ekonómiku, ita dependente ba Fundu Petrolíferu, ita hakarak kria empregu, mas ita mós hakarak buka para kresimentu mós aumenta. Kresimentu aumenta no empregu de'it la to'o, tanba ne'e saida mak ita halo! Ita fó apoiu ba sidadaun kiak sira, 70% pequeno agrikultór subsistensia, agora sira ne'e ita tau matan oinsá? Tanba maioria, se ita boot-sira haree didi'ak nia organiza an iha grupu rua. (...).

Ita iha populasaun grupu rua (2)

Grupu sira ne'ebé hosi foho tun mai sidade no ida **seluk grupu sira ne'ebé hela iha rurais**, grupu sira ne'ebé iha zona urbanas no grupu sira ne'ebé hadau moris, halai mai iha ne'e (sidade) buka moris, balun sai funsionáriu, balun sai polísia, balun sai F-FDTL balun ba serbisu iha loja sira, husik hela iha kotuk sira ne'ebé moris subsistensia katak la iha koñesimentu ba adapta an ba mudansa, sira la iha kapasidade kompras, sira izola an iha fatin de'it, ke dala ruma loron boot mak ita ba haree sira, sira ne'ebé halai mai Dili, ne'e fahe tan ba grupu rua (2) ; **sira ne'ebé serbisu no sira ne'ebé la serbisu**, karik ita la integra sira neineik sira sai bairru de latas(...)ke pais Dezenvolidu sira naturalmente iha ida ne'e, tanba saida? Sira iha esperansa boot ida katak mai iha ne'e bele hetan serbisu, soké sira mai la hetan serbisu (...)

Ita haree vendedores ambulantes iha estrada sira, iha jardim sira, tanba sira hadau sira-nia moris, entaun sira buka forma hotu buka sira-nia moris i sira sai grupu ida ke pratikamente espikula presu produktu sira-nian. Ita haree iha foho modo futun ida dolar ida, sira mai fa'an tutan fahe tiha ba futun tolu dolar ida nafatin, tanba sira la iha dalan seluk, se grupu ida ne'e ita la integra mak grupu ida ne'e mak sei sai bairru de latas, tanba sira labele fila ona ba foho. (...) Entaun ita atu rezolve problema tenke hatene problema nia hun ne'e mai hosi ne'ebé? Foin ita rezolve, porké se lae ita-nia rekursu ita kanaliza fali ida ba ida, mas ita husik hela ida. Entaun ha'u hanoin la'ós de'it problema empregu ke ita tenke kria.

Dalaruma ita nia sosiedade sira kritika tanba sá Governu la kria empregu barak? i timoroan sira barak sai hotu ba li'ur! Ideal. Ne'e Timor kria, mas realistikamente Timor la iha kapasidade atu kria, nein sira ne'ebé ko'alia aban-bainrua sira mai ukun fali mós sira sei labele. Tanba saida? Tanba evolusaun sósiu-ekonómiku ne'e evolusaun ida lento i entaun dala saida mak ita uza atu kria, fó apoiu ba sira kbiit la'ek, mas ita mós sei redistribui ou distribui rekursu ne'ebé ita iha ba sira ne'ebé la iha kondisoins, liuliu zona rural sira.

Ita halo reajusta uitoan ba ita-nia prioridade la halai sés hosi Planu Estratéjiku dezenvolvimentu Nasionál (PEDN) mas ita tenke halo ajustamentu uitoan, tanba se ita dehan fatuk ona entaun ne'e ita problema. Tanba na verdade tomada desizaun hotu ita-nian ne'e mai hosi diagnóstiku ida ba situasaun sósiu-ekonómiku pais nian, ida ne'e mak fó dalan ba ita, ita elabora ita-nia planu multianual/puri anual. Ita ezekuta ita-nia planeamentu sistemátika, rigorozu. Ita implementa ho objetivu atu hetan metas no

objetivu sira, avalia alterasaun no mudansa ne'ebé iha para *ao longo dos tempos* ita ajusta ita-nia an ba evolusaun sira ne'e.

I entaun para sistematiza uitoan ita-nia atuasaun no evita arbitrariedade, (katak ita halo buat ne'ebé mosu iha ita nia hanoin ita halo kedas) i entaun fó sai livru oan ne'e (**LIÑA ORIENTASAUN BA ELABORA PROPOSTA ORSAMENTU 2020 – 2023**) ke sei orienta Governu nia esforsu atu planeia hahú hosi 2020 ba 2023. Ita labele halo ida ne'e iha Orsamentu 2019, tanba ita iha fulan neen de'it halo orsamentu rua, ita halo serbisu kuaze iha presau nia laran, mas ha'u hanoin tempu ona ita ajusta. Ita boot sira haree iha livru ida ne'e, define objetivu ne'ebé ita atu atinje:

- **Kresimentu Ekonómiku tenke liu 7%,**

Ne'e ita-boot sira ba hetan iha Programa Governu tinan 5 (ambisiozu), tinan ida ne'e depois de resesaun ekonomia, tinan ne'e ita nia avaliasaun no previzaun Banku Mundial nia kresimentu Ekonómiku 3.9%, tinan oin 4.9% i signifika katak ita-nia ambisaun boot liu, la tuir realidade ne'ebé hatudu, mas ita bele provoka kresimentu aumentu boot uitoan, dalan mak saida? Aumentu orsamentu ba despeza do estado, se ita hakarak atinje ida ne'e, tanba setór privadu iha difikuldade akompaña ita, i setór ne'ebé asumi responsabilidade boot mak setór estatal, entaun aumentu orsamentu para sírkula maka'as iha sociedade nia leet hodi provoka kresimentu.

- **Redusaun Pobreza ba 10%**

Segundu iha Programa Governu husu no impoin atu ita **kontribui ho 10% redusaun pobreza**, ohin Sra. Ministra dehan ita pobreza 40 ital % (2014) ne'e signifika katak depois de mandatu ita tenke hela 30%, katak Governu ida ne'e kontribui 10%.

- **Kriasaun Empregu**

Sessenta mil (60.000) empregu, estatística Ministériu Finanzas bele fó, mas 300 mil se kazu governu ida ne'e, na verdade ita hela tinan tolu de'it, tanba 2023 tama faze eleisaun, tinan tolu ne'e anualmente ita bele fó empregu, 60 mil empregu.

Tuir fali implementasaun Planu Dezenvolvimentu Estratéjiku Nasionál (PEDN). Se ita-boot sira haree definisaun prioridade nasionál, primeiru ita fó atensaun ba **setór sosiál**, segundu mak **infraestruturas**, terseiru mak área **ekonomia**. Iha liña orientasaun ida ne'e, ha'u muda, **primeiru área sosiál, segundu área ekonómika no terseiru infraestruturas**, tanba saida? Tanba tinan barak ita halo investimento ba infraestruturas, tempu para ita reduz lizeiramente infraestruturas, aumenta fali ba área ekonómika, jaqué preokupasaun sociedade nian tomak, realmente ita ba Parlamentu, ida ne'e mak sira husu, karik ita haree iha sociedade sira nia ezijénsia, exatamente ida ne'e mak sira husu, entaun prioridade número um ba **kapital sosiál**, número dois ba **ekonomia**, número três **infraestruturas**.

Tuir mai oinsá mak ita hakarak prioritiza ita-nia prioridade sira iha setór tolu ne'e. Ha'u tau, depois de rona Ministériu hotu-hotu iha fulan ida nia laran, sira-nia opinoin, sira-nia preokupasoin, ha'u reduz ba área intervensaun lima (5), ha'u la tau dezenvolvimentu institusionál porké ba ha'u dezenvolvimentu institusionál hanesan meu la'ós fim. Hanesan karik ha'u hakarak futebol ida, ha'u-nia objetivu mak hakarak manán jogu, mas loron kalan mak ha'u treina hela de'it la hatama golu di'ak liu *bubar* tiha. Entaun nia hanesan meu de'it tanba dezenvolvimentu institusionál ao longos de tempo. Ita iha 15 anos sei ko'alia nafatin nesiedade reforma institusionál nafatin. Ha'u uluk Prezidente ema dehan, quarta klase ne'e bele sai Prezidente ka lae? Ha'u sai tiha Prezidente (...) entaun signifika katak wainhira ita hatán ba serbisu mak foin hatene katak ha'u matenek liu fali ida uluk ha'u tama ne'e. Mas tama ne'e la hatene buat ida, tanba saida? Tanba ita aprende *aos longos tempos*.

- **Bee Moos**

Entaun iha primeira área intervensaun, ha'u iha **área bem-estar sosiál**. Atensaun sosiál ne'e sidadaun nia direitu, ida ne'e ita fó prioridade ba saida iha área tolu ne'e. Área sosiál ita fó prioridade ba **bee moos** (água potável) tanba ita-boot sira hatene ita iha

relasaun ho higiene, saúde, mal nutrisaun i bee. Governu sira kotuk husik hela eletrisidade 83%, Governu ida ne'e kontinua ho 16%, previzaun Ministériu Obras Públika nian karik orsamentu sufisiente, 2021 atinje 100%. I faze seguinte saída mak siro halo? Faze seguinte mak oinsá halo konversaun hosi gazoel ba gás para redús presu no avansa ho energia renovável.

Governu ida ne'e hili bee hanesan prioridade número um, Dili ita fó ba MCC **200 milloins** de dólar ba bee iha Dili de'it, ADB ho Obras Públika investe iha Munisípiu haat (4) Baukau, Lautem, Vikeke no Manufahi. Ida apoiu hosi MCC na ida fali fundu impréstimu. Governu halo saída? Governu investe ba iha área rurais. Ha'u nia proposta investimentu tinan oin ba bee moos se bele **40 milloins dólar**, ne'e iha atividade tolu ke ita halo, ida aumenta tanke konsersaun, seluk kria postu de distribuisaun i terseiru kanalizasaun. Tanba saída mak ita halo ida ne'e, ita haree ita nia comunidade sira iha rurais ba tu iha kanu sira. Ita-nia teknolojia la iha i ita espera katak bele hetan teknolojia. Iha Metinaru (sentru Instrusaun F-FDTL-Metinaru) iha mil millaun litru bee, 250 mil litru kada tanke ida, uluk investimentu ho 350 mil dólar amerikanu hosi Governu Australianu. Nia iha kapasidade abastese 600 soldadu lorloron i karik kanu kotuk, fulan tolu kontinua abastese, tanba bee iha tanke natón ba aguenta fulan tolu, ita nian lae, bee tanke kotu ohin maran, tanba saída? Tanba kapasidade armazenamentu la iha. Postu distribuisaun la iha hotu-hotu dada ba los mai los, entaun bee prioridade número um.

• Abitasaun

Segundu; **abitasaun**: tanba saída mak abitasaun; ita kuandu ba Parlamentu, Parlamentu sira dehan tenke hadi'a povu nia moris, ema nia moris, ema nia moris ida mak abitasaun. Obras Públika halo esforsu ida ho ADB no Ministériu Finansas atu kria 4 mil uma iha Dili ba família sira, para organiza ita-nia sira ne'ebé karik ita la tau matan aban bainrua sai bairru de latas. Iha klase, sira ne'ebé iha osan, karik ida ne'ebé la iha sosiál, organiza sira ba fatin di'ak la fasil. Se ita-boot sira lee istória Singapura nian, polítika ida ne'e mak siro halo iha tinan 10 liu tiha sei iha ema ke hakiak fahi iha décimo andar (andar 10) ne'e mentalidade, ita susar atu muda iha tempu badak, lori fahi ba hakiak iha andar 10 tinan 10 liu. Livru Lee Kuan Yu ko'alia ida ne'e. Klaru ke ita lori ita-nia inan-aman sira ke toman ona hakiak fahi, manu, karik ita lori nia ba hela iha um andar, fahi nia tau iha ne'ebé? Ne'e problema ida. Ita iha dalan rua de'it, ita lori Polisia duni sira kria problema ho sira ou ita organiza sira, investe iha abitasaun.

• Apartamentu

Terseiru: investimento ba Munisípiu sira: ha'u-nia proposta e konvida setór privadu halo **investimentu apartamentu**, tanba ita-nia lei hateten, Funsionáriu Públiku hanesan mós tropas, 24 oras prontu ba área ne'ebé de'it, mas iha pratika dala barak sira la halo. (...)entaun halo nusa mak nia iha prepozisaun ne'e iha ba ne'ebé de'it, tanba nia iha família, entaun ita konvida setór provadu para investe iha apartamentu, estadu subsidia kona-ba nia utilizasaun. Ita hakarak desentraliza, fahe poder para depois halo nusa mak ita haruka ba se fatin la iha, entaun ita husu ba setór privadu para investe.

• Subsidia Material Konstrusaun

Subsidia material konstrusaun ba Zona Rurais: 2020, ita hakarak tau **50 milloins** dólar amerikanu ba abitasaun. **30 molins** ba ema sira ne'ebé kbiit la'ek ke labele halo mesak nia uma ou nia uma la di'ak, kákkulu 8 a 10 mil, minimu 8 mil dólar uma di'ak, três quartu iha kaza de bañu, tanba se ita halo uma, mas la inklui kaza de bañu ne'e *mesma coisa* ne'e ita problema boot.

Ha'u uluk sei Prezidente vizita suku sira, iha suku balun, suku tomak la iha kaza de bañu, inkrível, ohin iha mudansa boot, mas ha'u hanoin estadu tenke fó kaza de bañu 3 mil razoável. 10 milloins subsidia ba material konstrusaun, katak material ne'ebé sai hosi Dili ba Lospalos nia folin tenke hanesan iha Dili, Estadu subsidia material konstrusaun ba sira ne'ebé la iha kbiit no kbiit natón atu halo uma.

Iha ha'u nia rain Baguia dudu tiha fatin atu halo uma ba husu dehan rai-henek karrada ida 250 dolar amerikanu, entaun ha'u husik hela de'it entaun sira dehan *rakyat* halo uma lalais Prezidente dudu tiha rai husik hela de'it. Presidente uma la iha. Uma e possível karrada ida 250 dolar ba sidadaun ida atu halo uma ne'e impossível kuantu mais kbiit

la'ek. Entaun ita subsidia material konstrusaun. Kuartu **10 milloins** ba troka uma sira ne'ebé zinku ferujen hotu ona, tau fali alumíniu (...) ba uma na'in ne'ebé kapasidade kompara la iha atu troka. Se ita dehan moris di'ak, moris di'ak oinsá!

- **Edukasaun no Formasaun:**

Ha'u horbainhira ba Parlamentu, ha'u rona ha'u nia tilun mean tiha, horbainhira ha'u dehan ba Sra. Ministra Edukasaun Juventude no Desportu no nia vise imi presiza sala hira? Sira dehan presiza sala 500, signifika eskola 500, ha'u aumenta tan 500 para 1000 halo dala ida de'it i ne'e ba hotu projetu komunitáriu, porké selae ita fila ba fila mai mak eskola la di'ak, eskola la di'ak, bainhira mak ita atu rezolve problema ida ne'e. Pois ita iha osan ba halo buat seluk pois menus ba halo eskola. Labele! Ha'u hakarak halo dala ida de'it. Sala eskola, sala ba professores, sala ba biblioteca, sala ba laboratóriu no sala ba kantina eskola. Tanba eskola sira daudaun ne'e balun 40, 50 estudante sala ida de'it(...).

Universidade: Ha'u husu Sr. Ministru Ensinu Superior ho Obras Públika para serbisu maka'as para harii sidade Universitáriu iha Aileu, investimento mais 100 milloins, não interessa, investe. para estudante sira han ne'ebá, hela iha ne'ebá, professor hela iha ne'ebá para foku ba estudu, la'ós hanesan iha Dili, mai halo manifestasaun hasoru Parlamentu (...)

Formasaun: Ita iha 15 mil joven kada tinan tama iha merkadu traballu, mas ita iha sentru formasaun rua, Bekora no Tibar la iha kapasidade para absorve ema sira ne'ebé tama. horibainrua ha'u dehan ba Sekretáriu SEFOPE, ha'u hakarak ita-boot harii eskola ida di'ak liu iha Pasífiku, ami harii ida kapasidade simu mil pessoas, han, hemu no toba iha eskola refere, eduka fó kompeténsia ba nia, ita Timor presiza eduka ema iha karater, moral, no étika ne'e mak importante, matéria ne'e sosa, ida ne'e mai hosi inan-aman, kuandu inan-aman la eduka di'ak nia sai sidadaun ida *está a mais no serve destrói prejudica próprio sociedade*, entaun molda nia karater no pensamentu, tanba ne'e importante liu duké fó kompeténsia.

- **Saúde:**

Foin dadauk ko'alia ho Sr. Ministru katak iha 153 klínika, ha'u dehan 200 mós di'ak, halo dada ida de'it, mas labele ke ita halo baibain inventa ne'e, impressiona nia presu buat 40 mil ba fali 100 mil, hanesan Sr. Ministru nia proposta iha tinan kotuk Sr. Ministru Ensinu Superior apresenta eskola tolu kuaze 80 ital milloins dólar, eskola Peska iha Manatutu 36 milloins, ha'u dehan, ha'u la halo ida ne'e, maun Xanana Manatutu oan hirus ha'u mós la buat ida. Mas ha'u la halo. 36 molins dólar, **tão louco**, tanba saída? Ema mai impressiona presu, sasán no projetu. Iha Televizaun (TVTL) uluk 25 milloins, foin dadauk *re-deisgn*, 6 milloins dolar, *poupa muito dinheiro*. Se mak ajuda ita na'ok fali ita nia estadu? Ema aproveita ita-nia ignoránsia, nia impulsiona presu, la iha standard ida. hadi'a ita nia Ospital, ita hotu-hotu ba li'ur depois ita-nia hospital, hanesan mos ita nia eskola, ita-nia universidade. Iha Indonésia ita-nia estudantes rihun 7, osan hira mak la lori ba ne'ebá? Nusa mak ita la lori de'it professor mai! Ita lori professor mai, ita manán buat rua, ida desenvolve próprio instituisaun, professor sira hetan esperiénsia di'ak, ida seluk fó matenek ba ita nia oan sira. Ita manán dala ida, duké ita haruka ba, nia manán de'it matenek mas desenvolvimentu ita nia instituisaun la iha.

Ospital mós ita investe, halo hela estudu, tinan kotuk ko'a iha pediatria i espera katak tinan 2020 tau osan i aleinde ida ne'e hadi'a Ospital Lahane para moras kontajioza bele tau ketak labele kahur iha HNGV. Ema asma tau iha ne'ebá, mas para ida ne'e di'ak ita tenke tau osan sela tau osan halo nusa mak doutór sira serbisu di'ak!

Kultura, Patrimóniu Estadu, Juventude no Desportu:

Liuliu ita nia joven sira, ita tenke investe uitoan. Ha'u horbainhira hateten ba SEJD, han golu hitu ne'e demais ne'e(...) ita presiza investe, mas tenke iha planu di'ak, investimentu di'ak, tau sira iha fatin ne'ebé di'ak karik sira treina. Horibainhira ha'u ko'alia ho SEJD, katak jogador sira bele ba hela ho PNTL, treina, han hemu iha ne'ebá (kazerna). Área ida ne'e ladún desenvolve barak, porezemplu ita iha ne'e la iha Sentru Kultural, uluk (tempu Indonézia) iha sinema ke kalan fila ba uma, lori família sira sai hare sinema, ohin ita la iha, to'o uma han hotu ba liu kama. Presiza desenvolve Sentru Kultural atu halo vibransa,

sidade mais movimentadu, i por outro lado investe mós ba biblioteka nasionál, espera katak tinan ida ka rua bele hotu ona.

Inkluzau, Protesaun Sosiál:

Seguransa sosiál, Kontinua iha área intervensaun ida ne'e ita nia veteranu, ita iha terseira idade, ita iha bolsa da mãe no área sira seluk ke ita ajuda ba kbiit la'ek sira i iha área ida ne'e ha'u mós tau pontu ida kona-ba sidadania.

Sidadania: tanba saída mak ha'u tau área ida ne'e importante, sidadania ita ko'alia buat tolu;

sidadania ativa: sidadaun ne'ebé hatene saída mak nia hakarak no halo oinsá nia bele to'o hetan.

Sidadaun Otimista: Sidadaun ne'ebé kontribui ba bem-estar koletivu, laos sidadaun ida ke aproveita de'it. Parasita, sidadaun ida ke ativu i tuir espíritu patriotizmu.

Ha'u ko'alia ho Sr. Koronél Koliati iha aviaun; Sr. Primeiru-Ministru cidadania ne'e tenke baku maka'as, selae ita-nia nasaun sei la reziste tinan barak, tanba valores la iha entaun espíritu nasionalizmu. Espíritu nasionalizmu mai hosi ne'ebé? Vontade atu hametin unidade, vontade hametin ita-nia identidade. Espíritu autonomia, ha'u nasaun independente ona, ha'u nia nasaun laos provínsia nein tau pouco kolónia, nia hanesan nasaun sira seluk iha mundu. Selae ita-nia nasaun mak independente, mas ita-nia komportamentu sei provínsia ou entaun kolónia, ita hanoin hanesan uluk ita sei ativista, balun gerrilleiru. Ita agora Estadu.

Patriotizmu; Sentimentu de amor ba ita-nia rain, respeito ba símbolu sira nasaun nian. Uluk Indonézia tempu ha'u subar iha Dili, tinan kuandu dada bandeira hotu-hotu firme atensaun, mas ita-nian dada bandeira ema sei la'o tun la'o sa'e, i pior liu kuandu serimónia ema la partisipa. Indonézia nian uluk hotu2 ba fó kontanez, la hatene tanba saída? Mas ita agora la iha ke hahú husi funksionalizmu públiku sira. Nia iha indiferente ba buat ne'ebé estadu nian. Mas que isso? Ezemplu saída mak ita fó ba sosiedade? Ita harii nasaun ida pois ita-nia komportamentu hanesan ne'e, ita fó ezemplu saída ba ita nia oan sira aban-bainrua?

Talvez ita nia Konstituisaun fó liberdade nacionalidade dupla ita hakrúk ba bandeira Portugal nian, ba Austrália nian menus ita-nia mak ita la hakrúk. Entaun sidadania importante i ha'u halo iha kestaun. Se ha'u investe ba iha ita-boot nia moris por favor ita-boot kontra partida saída mak fó ba Estadu? Ita nian lae! nia halo buat hotu-hotu kontra Estadu, mas nia simu nafatin hosi Estadu. Agora lae! Iha ne'e ba oin, oin-seluk em troka. I ha'u espera iha tempu badak sei hasai dekretu lei atu regula hahú hosi Funsionáriu sira, F-FDTL, PNTL, veteranu sira ba to'o sidadaun, terseira idade ne'ebé simu osan Estadu nian fó buat ruma ba nasaun. Ita boot tenke fó mós kontribuisaun la'ós simu de'it.

Ekonomia no Finansas Públika:

Se ita-boot sira haree iha ekonomia, ita ko'alia uitoan kona-ba baze ekonómika ke tuir ita-nia Konstituisaun artigu 178; forma komunitária liberdade i jestaun emperezarial, ne'e hanesan baze ekonómika ita-nian, tuir organiza-an iha setór privadu, setór estatal no setór kooperativa. Setór estatal ita-nian pratikamente ita tama iha parseria públiku-privadu, ita foin iha kompañia estatal ida TIMOR GAP-EP, Obras Públika hanoin hela transforma eletrisidade i entaun tolu ne'e hamutuk mak fó kontribuisaun dezentvolvimentu ekonómiku ba ita-nia rain. **Setór Kooperativa**

Ikus liu iha setór kooperativa i setór ne'e fahe ba iha tolu; kooperativa kalasikamente koñesidu buat ne'ebé ita halo, ke meu produsaun kooperativa nian i ida mak na'in produsaun ne'e agrikultór sira-nian no ida na'in meus produsaun ne'e comunidade nian, se comunidade ne'e ita kompara karik bolu komunal ke ita-nia lei fó dalan.

Setór produtivu; Setór produtivu ko'alia kona-ba setór primaria, setór primaria ne'e mak agrikultura, água e pekuária no peska. 70 ital populasaun ba liu vida ida ne'e. Saída mak ita atu halo. Iha pais balun subsidia produsaun, mas aumesmu tempu subsidia transportes. Ita-nia subsidia de'it produsaun, iha América produsaun la subsidia, fila rai

no kuda ne'e agrikultór sira mak halo, mas transporta produtu ba merkadu, ne'e Estadu subsidia. Saída mak ita hakarak halo, ita hakarak halo buat rua dala ida, **subsidia produsaun no subsidia transporta**. Ne'e objetivu saída? Ida estabiliza presu, para inflasaun ne'e labele iha. ita sosa lakeru mutin iha Same mínimu fuan 16 mak um dólar, mai iha Dili fuan rua um dólar, labele.

Entaun subsidia transporte signifika katak produtu ne'ebé agrikultór sira produz, nia mai diretamente ba konsumidór i nia presu razoável. Klaru ke ne'e iha problema boot ida liuliu espekuladór sira ne'ebé fa'an iha estrada sira, maibé ita tenke brani lida ho sira para organiza sira hosi transita ba iha ekonomia formal. Ha'u husu ona ha'u nia asesór atu halo estudu oinsá mak halo transformasaun ida ne'e, objetivu ida mak estabese presu, aumentu konsumu i fomenta produtividade, porké se lae, susar! tanba ita haruka produz, mas sira dehan atu ba fa'an la di'ak(...)Ha'u hanoin ita (Governu) presija investe ida mak subsidia transporte.

Por outro lado, ha'u mós dehan ba Sr. Ministru Agrikultura, ha'u lakohi haree Governu (MAP) jere tratór. trator taka tiha terpal dadeer husu bom dia, meidia Botarde, kalan bonoite! pois la halo buat ida, ha'u hakarak tinan ida ne'e tenke leilaun hotu. Sr. Sira hosi Ministériu Agrikultura iha ne'e karik favor rona ida ne'e. Tinan oin ha'u lakohi haree tan trator iha MAP, fó ba setór privadu, sira mak jere no fila rai, ita(Governu) selu de'it. Ita iha dalan rua de'it han na'an mak di'ak ka hakiak fahi mak di'ak, ha'u prefere han na'an duké hakiak fahi.

Agro pekuaria, ha'u hare hakiak fahi iha fatin hotu di'ak, menus Ministériu Agrikultura nian iha ha'u nia tempu sei Prezidente Repúblika, ha'u vizita suku, haree Ministériu Agrikultura fahe fahi ba fatin hotu, liu loron lima-noon, fahi sira krekas hotu, povu fila fa'an tiha, ha'u husu tan saída? Maun tan hahán la iha, entaun ha'u husu ba Ministru halo favor serbisu ho setór privadu para ita halo rasik hahán fahi nian iha Timor. Aviaun mak ita halo labele, mas hahán ba fahi mós ita labele ne'e susar. Pois ita dehan ita iha 17 biloins. ita ba sosa iha Indonézia ke buat ne'ebé ita mós bele halo iha ne'e, ita-nia ulun fatuk susar uitoan, mas porké selae ita marka pasu(...)

Peska: uluk ha'u sei Jenerál, rona atividade iha peska ilegais 40 ital milloins de dólar anuais, kuandu ha'u ba Prezidente, Sr. Eis Ministru Agrikultura no Peska Asanami hateten ba ha'u katak 250 milloins de dólar anuais mak ita lakon iha peska ilegal, entaun saída? Ha'u husu sosa ró peska tolu, treinu ita-nia ema sira ba kail ikan, se lae ita la investe depois, ita investe ba buat hotu-hotu menus ba peska, pois hotu-hotu ko'alia, PN mós ko'alia, mai sociedade mós ko'alia, Governu mós ko'alia pois nein ida halo.

Setór sekundaria:

Setór sekundaria ko'alia kona-ba industria transformador no industria estrativa, estrativa katak ita hasai hosi rai laran hanesan mina no gás, mas ita mós avansa transformador tanba ita hakarak transforma industria petrokímika iha Betanu, ne'e projetu ida boot prioridade boot ba nasaun. Mas ita sente algaridu tanba maun Xanana dehan ona sei la book iha Fundu Petrolíferu atu halo investimentu iha ne'ebá. Ne'e signifika katak fó margem ba Governu investe iha mikro, enkuantu makro boot ida ne'e ita investe iha mikro haree ba problemas mediatos lorloron no lori eleva nia ambisaun no interesse hodi korresponde ba ita-nia longo prazu.

Setór Tersíariu:

Setór tersíariu ko'alia kona-ba serbisu, turizmu, sentru finanseira, komérsiu. Ita-nia turizmu, ha'u dehan ba Ministru Estadu katak ita tenke iha projetu konkretu, ita labele ko'alia polítika, polítika de'it. Primeiru-Ministru halo polítika, Ministru halo polítika, Diretór Jerál mós halo polítika, Diretór Nasionál mós halo polítika, be sé mak atu implementa, sé mak atu halo planu, ita sai Jenerál hotu la iha ida mak soldadu! Ha'u hanoin ita tenke iha projetu konkretu para ita halo ona investimentu. Ha'u foin dadauk ba Singapura, ita-nia enkarregadu informa dehan Sr. Administrador sira ba iha Singapura, ha'u dehan loloos la haruka sira ba ne'ebá (Singapura) sira ba só fa'an matan de'it, fila la aplika, ita-boot sira ba haree jardim *made*, ita nian ne'e bonitu, ita nia atrai ema ruma? Ita na'in de'it mós la ba! entaun ita presija krítiku, artes para ke ita halo sasán atrai ema, mas para ida ne'e ita tenke iha planu projetu entaun ha'u espera katak tinan oin

Ministériu Turizmu bele iha planu di'ak.

Horibainhira ha'u dehan ba Sr. Ministru Estadu, katak tenke hadi'a uluk sira ne'ebé iha ona ne'e. Iha Pousada Maubisse, sorin fó ba hotéis, sorin ba halo toos, ne'e halo seda ne'e! ita *free land*, fó ba ema explora de'it sorin povu uza lakohi entrega dehan hela kleur ona lakohi sai. Ha'u dehan se mak dehan labele sai, dala barak ha'u dehan *o Estado não saber usar poder, esta fomentar anarquismo*. Estadu ne'ebé la hatene uza nia poder, nia fomenta diretamente anarkizmu. Ita sira iha ne'e iha intrese ruma atu fomenta anarkizmu iha ita-nia rain! Entaun tenke foti medidas administrativas, regulamentu, dekretu lei, lei para sira kumpri.

Iha Marobo halo kapás tiha gasta 350 mil ital, foin dadauk ha'u ba haree sentina sira ema hada fatuk nakonu iha laran, tanba ema la iha atu jere, entaun ita tenke halo buat ida integradu hahú, to remata no ba longo prazu, halo uitoan, mas di'ak, duké halo barak, mas ladi'ak.

Komérsiu: Horibainhira ha'u ko'alia ho Embaixadór Jakarta kona-ba komérsiu. Ita ho Indonézia iha defisit boot iha kontra partida, Indonézia sosa ita nia saída? 500-600 milloins ba Indonézia, mas la iha kontra partida. Ida ita fó ba mós fó, ida sira mai foti iha ne'e mós lori, i ida be ita lori ba mós ba. Iha tinan hira liu ba Timor tama iha Bali 1.2 milloins, entaun ita tenke komesa valoriza ita-nia produtu sira, organiza di'ak para depois asesu ba merkadu, porké pais ida ne'ebé la valoriza sira nia produtividade o país ke *não tem futuro*.

Tuir mai **Finansas Publika:** ne'e ko'alia kona-ba polítika makroekonómika, diversifikasaun ekonómika, setór finanseiru no finanças publika (haree iha dokumentu) iha área finanças publika, buat ke ami halo mak transferência hosi modelu orsamentu tuan ba modelu orsamentu foun, orsamentu na baze de programa, MF halo ezersísio boot ida, mas presija tékniku espesialista para ajuda ita-nia funsionáriu sira para la'ós de'it ko'alia conseitu mais mekanizmu sira atu tuir tanba se lae ita ko'alia conseitu mas iha mekanizmu ita tuir fali buat seluk, tuir fali modelu seluk, entaun ita presiza hadi'a ida ne'e. Dezenvolvimentu rejime konstrutivu ita avansa boot ida.

Konetividade:

Konetividade/koneksaun; Ne'e ko'alia kona-ba buat tolu; infraestruturas, lojística no telekomunikasaun. Infraestrutura mak hanesan portu, aeroportu, estrada, liuliu Governu fó prioridade ba Aeroportu Dili i aviasaun. I ha'u espera katak ita bele hadi'a ita nia aeroportu. Horibainhira Embaixada Japaun fó dezeńu ida, ha'u haree aeroportu Dili simples demais, ha'u dehan ba nia Ita-boot halo simples hanesan ne'e, Maun Mari hamnasa ha'u mate, nia dehan Matan Ruak ibun boot, mas Aeroportu Oekusi di'ak liu Dili, entaun ha'u hakarak aeroportu Dili di'akliu Oekusi. Ita-boot ošan la to'o ami investe, mas labele hanesan ne'e porké deskredibiliza e ha'u hanesan Primeiru-Ministru la aseita ida ne'e.

Estrada sira ne'ebé tenke halo, klaru ke infraestruturas programa ida ke ita iha. Se ita-boot sira haree iha Fundu Infraestruturas ha'u halo mudansa ba alterasaun balun.

- \$300 mil mai kraik tama projetu komunitáriu.
- \$5 milloins mai kraik; jere Husi Munisípiu no Ministériu sira.
- 5 milloins ba leten: mak ba Fundu Infraestruturas.

Ha'u halo ne'e tanba saída? Iha dokumentu ne'e esplika primeiru, kria empregu, segundu dezenvolve setór privadu, se lae 50 mil dólar hotu-hotu mai iha ne'e. Ha'u kuandu sai Primeiru-Ministru veteranu lorloron xateia ha'u! Ha'u dehan ba sira imi halimar ho Maun Xanana ho ha'u imi buan sai. Ha'u uluk komandante imi nian, ha'u seidauk hatene halo estrada imi mak hatene ona halo estrada ka imi manu-talin. Ha'u jura para kumpri lei i obriga ema seluk kumpri lei. Ai ida ne'e ami la hetan, Governu sei kria kondisoins para ema hotu-hotu hetan, agora ne'e uma forma justu, honesta não favoritizmu porké se lae!

Setór Privadu hotu-hotu haknauk de'it, 17 anos setór privadu sei nafatin, nia haknauk de'it, nia la'ós visionáriu, setór privadu ne'ebé ita presija mak ida visionáriu, akompañá dezenvolvimentu do país la'ós sira ne'ebé haknauk aban ba sosa tiha *wild drive* ida,

bainrua iha *istri kedua*, bain tolu *bankrut* tiha. Setór privadu dala ruma rona ida ne'e la gosta, mas é bom ke seja dita, muda konseitu.

Lojística, transporte marítima, aéreu, liuliu área tolu ne'e. Ita iha problema kona-ba transportes aéreu Sr. Dr. Ramos Horta eis Prezidente hateten kuaze país rua ne'e eleva presu ba ita. Ita tenke investe. I ha'u hakarak investe. Ita haree modelu seluk, mas se nesesáriu para ita-nia rasik di'akliu. Ita sosa tiha ona aviaun ida ba Oekusi, nia sai hanesan baze ida ba futuru aviasaun Timor nian.

Transporte marítimas: Ha'u horbainhira dehan ba Sr. Ministru Transportes no Komunikasaun para sosa barakasa tolu (3) tanba saída, para labele fó presaun ba estrada sira, selae Atambua nia *truk* boboot tun to'o Lospalos, ita nian ki'ikoan hateke de'it. Barakasa nia la presija portu, nia tun iha fatin ida ne'ebé de'it bele i redús presu ba transportes, redús presaun ba ita-nia estrada sira, tanba manutensaun ne'e karru i lais.

Transporte terrestre: Ha'u hanoin ita-nia tenke organiza liuliu Dili, Ministru Transportes sei haree, mas provavelmente ita tenke investe iha transportes públiku, aumenta transportes públiku, redús karreta estadu sira i redús tráfik. Ita-nia estrada di'ak ona, ita bele sosa karreta 50-60 pasajeiru dala ida duké *mikrolet* sira halai, klaru ke ita sei fó fali *jalur* seluk ba sira, ita tenke organiza, tanba konetividade ne'e importante ita ko'alia dezvoltimentu, mas se ita la dezvoltolve área ida ne'e (transporte modernu) susar la halimar.

Telekomunikasoin: Telekomunikasoin ita ko'alia kona-ba buat rua, ida mak fibra ótika, espera katak buat hotu-hotu di'ak, tinan oin avansa dada kabu submarinu, tanba ita internet karru no lento, para presu tun no velocidade aumenta. Aleinde ida ne'e ita dada fiu ba munisípiu sira, ita hakarak lori ba eskola sira, Klínika, Unidade Polísia paraké konetividade ne'e di'ak liu.

Televizaun:

Ita nia televizaun (TVTL)kobre de'it 43% populasaun, ha'u nia pergunta 52% ne'e haree seda? Tinan ida ne'e ita investe ona no hakarak 100% populasaun ba 2 anos ba oin. Investimentu 13 milloins dólar amerikanu, ita hakarak timor laran tomak hare televizaun Timor nian. Se Kupan haree ita-nia di'ak liután. Ida ne'e mak molda ita-nia unidade, molda ita-nia pensamentu no molda ita nia koezaun. Se ita la atinje ida ne'e, ita susar mobiliza nia ba dezvoltimentu.

Área Konsolidasaun Reforsu Seguransa no defesa externa nian :

segurança no defeza; ha'u nia instrusaun tolu (3) ba Ministru ;Formasaun/treinu ida de'it hosi F-FDTL mak fahe ba fatin seluk, tanba sistema ita-nian, sistema integradu mas para depois ba treinu/promosaun ida-idak halo ninian. Iha Konseitu Estratéjika Defeza Nasionál hateten; iha kazu konfliktu ida *gabung* (hamutuk) PNTL-F-FDTL tenke ida de'it, para nia hatene tátika ida de'it. Hanesan uluk operasaun konjunta, polísia la hatene kaer kilat boot, la hatene kambailota no revolver formasaun iha seksoins, formasaun iha pelotoins nia la hatene, oinsá mak nia ba tiru malu. Entaun ha'u dehan halo ida de'it, F-FDTL halo ketak ninian, PNTL halo ketak ninian lae! para poupa osan.

Segundu PNTL nian, hadi'a; lei. Iha PNTL kuandu komandante hasai indixiplinar ba membru ida, nia halo rekursu ba Tribunal, tinan rua halimar iha uma tama fali. Saída mak ne'e! La iha rekursu. Sai, sai ona, uluk ha'u Estadu Maior Jenerál hasai 600 resin, momentu ne'e UNTAET fó kompeténsia ba ha'u ke ha'u-nia desizaun administrativu vale ba lei, entaun ha'u halo lei taka tiha dalan, i sira la lori ha'u ba tribunal. Entaun sistema ita nian (PNTL) ladún di'ak, la fó poder ba komandante sira, komandante sira nia poder autoridade la iha.

Iha sistema organizasionál sira, iha buat tolu ke ita tenke tau atensaun; ida mak Komandu, se mak manda, sé mak fiskaliza, sé mak puni no fó louvor, se ita la iha ida ne'e, hanesan karreta karik volante la iha kondutór mós la iha i halai tuir nia hakarak.

Fila Komponente Naval F-FDT nian no Polísia nia ba Guarda Kosteira. Selae ró sira para iha ne'e, ida sorin ne'ebá para ninian, depois! Ha'u uluk Estadu Maior Jenerál tinan barak preokupa ba ema nia moris mós, la'ós de'it ba forsa sira. Entaun halo nusa mak

poupa osan, ha'u espera katak Sr. Ministru haree ida ne'e. Naturalmente iha rezisténsia, mas tenke esklarese para gaña tanba se sira ida de'it halo misaun barak liu Polísia nian no F-FDTL nian. Agora hanesan ne'e, ita nasaun ki'ik, kiak tan pois duplika hotu-hotu hakarak iha ró.

Relasaun Internasionais:

Relasaun internasionais, ha'u ko'alia ho Ministru Negósiu Estranjeiru, iha Pais balun ita lalika tau embaixada, apesar relasaun ita-nian importante iha mundu, mas ita mós tenta tau atensaun gañu saída mak ita hetan hodi tau embaixada iha nasaun ida ne'e. Aspetu ekonómiku, polítiku no diplomátiku! ita tenke halo avaliasaun sira ne'e para realístiku.

Konsilidasaun da Reforma setór Justisa no Demokrasia no Direitu Umanu:

Liuliu halo nusa mak reforsa tribunais sira, Ministériu Públiku, fó kondisaun di'ak, forma ita nia juis sira, ne'e importante, selae ita hakilar dehan funsiona di'ak, mas se ita la investe ne'e susar, entaun ita tenke investe.

Ne'e área intervensaun lima ke ha'u ko'alia. Iha aspetu balun kona-ba dezentvolvimentu infraestruturas, ne'e hanesan ohin ha'u dehan ba ita-boot sira, alterasaun Fundu infraestruturas ne'e iha objetivu lima:

1. kria empregu
2. dezentvolve pekena no medias empreza /setór privadu
3. fó atensaun ba konteúdu lokál
4. kria kompeténsia institusionais no umanu
5. kontribui ba dezentvolvimentu ekilibradu iha ita-nia nasaun.

Ba munisípiu sira, (suku sira) iha projetu komunitáriu PNDS, projetu ne'e ha'u hakarak iha flexibilidade uitoan, projetu ne'e tenke povu mak hili, povu mak halo/jere, ita (PNDS) apoiu tékniku de'it. Tanba saída mak ha'u dehan ida ne'e importante, tanba nia iha objetivu rua; ida kria auto konfiansa, ida seluk *ownership*/nain ba prosesu i aumenta tan ida eleva nia nível ambisaun kompeténsia, kuandu nia iha ona kapasidade kompeténsia. Selae sira dehan ami atu halo ida ne'e mas sira dehan labele, sira nunka sente hanesan na'in i ne'e depende de'it ba Munisípiu no Governu sentrál. Foin dadauk sira balun dehan, sira iha suku kapasidade la iha ita ajuda, ida bele kapasidade iha mos ita halo sala, sira ne'e ita fó hanesan *on job training*, siro halo mak aprende duké ita la fó, ita kaer hotu pois ita halo aat liután. Ita tenke fahe para hotu-hotu halo i saída mak sira nia kontribuisaun atu fó.

Horibainhira ha'u ko'alia ho Sra. Diretora PNDS, ita halo fazeadu, i ha'u nia desizaun ke tinan oin tau ba suku 442 dala ida de'it projetu komunitária, ne'e primeiru. Segundu tau mós osan ba postu sira, minimu 100 mil dólar, para halo saída, hadi'a netik bee, hadi'a eletrisidade, pinta uma, zinku aat, limpeza para nia (administrador Postu) iha autoridade! lae sira hanesan mataros de'it, la iha dignidade, tanba ita la investe, tanba sira iha serbisu ne'ebé importante liga munisípiu ho suku sira. Aleinde ida ne'e ami iha projetu tolu ba suku sira, suku ida **tau 30 mil dólar amerikanu**, primeiru 10 mil ba feto, ho objetivu atu hadi'a ekonomia família, rua kombat violénsia doméstika, kombat mal nutrisaun i hotu-hotu ne'ebé hakarak hetan asesu ba fundu ne'e, nia tenke organizadu, kuandu organizadu ita bele mobiliza sira. Fundu ne'e nia kondisaun ida de'it, sé mak halo lakon nia tenke selu fali, signifika subsidiu ida ne'e uma vés para todas; ha'u fó kail ba ita-boot, ba kail han mak ikan laos kail, kail passa fali ba seluk.

Segundu ba jovem sira, ha'u horbainhira ba OPS sira, jovem sira ne'ebé fó sira-nia kontribuisaun ba OPS bolu KPK (...) tau 10 mil ba sira, tanba sira-nia misaun, seguransa, limpeza na ekonomia, fundu ne'e nia prinsípiu hanesan. Terseiru ba morador sira fó subsidiu ba sira tanba sira fomenta ita nia identidade i transmite ba oan sira, nia prinsípiu hanesan de'it, fó kail mas la fó ikan. Vinte anos fundu ne'e nafatin, 20 anos nafatin, se mak halo lakon selu fali.

Ha'u espera ida ne'e bele kontribui, klaru ke ita-boot sira iha Munisípiu, Postu no suku sira, ita-boot sira iha responsabilidade boot loos para kontribui. Buat sira ne'e ita-nia hanoin saída? Ita rezolve problema imediatu sidadaun sira-nian, aleinde estabese

konfiansa ida ba mediu no longo prazu, intrese ba meius longo prazu ne'e mak saída, trabalho no produtividade, ida ne'e mak ita hakarak, se sira la serbisu, la produz ita-nia nasaun susar hakat ba oin.

Ida valoriza sira-nia produtividade, rua eduka labarik sira no forma joven sira, tolu tau matan ba saúde sidadaun sira-nian, haat labelle husik ema ida iha kotuk, liuliu sira ne'ebé ki'ik no kiak sira, ita tau matan ba sira.

Ho hanoin ida sira kontribui atu transforma ita-nia rain, sai fatin ida ne'ebé ita hotu bele moris no serbisu ba, ida ne'e mak ha'u nia hanoin.

Hakarak ha'u lembra fali ita-boot sira buat hirak ne'ebé ohin ha'u ko'alia, prioridade saída mak ita iha, solusaun saída mak ita fó ba problema sira ne'e, rezultadu saída mak ita iha, impaktu saída ba ema nia moris, iha kurtu, médiu no longo prazu, ne'ebé ha'u nia intervensaun mak ida ne'e.

Obrigadu Barak